





紀錄彙編卷之一百一  
靖難功臣錄

太宗文皇帝於洪武三十二年七月初五日爲姦臣  
齊泰等變亂 祖宗成法調兵殺害親王車駕奉  
天征討克懷來八月克雄縣漢州攻圍真定九月  
接應永平十月攻克大同十一月鄭村壩大戰大  
捷十二月取廣昭十三年正月取蔚州攻圍大同  
四月白溝河大捷五月圍濟南十月克滄州十二  
月東昌大戰三十四年三月夾河大捷閏月藁城



大捷十月克保定西水寨三十五年正月克東阿  
東平汶上沛縣四月小河齊眉山靈璧縣大捷攻  
破營寨五月至泗州降之過灘河六月渡江十七  
日平定京師

太宗興靖難之師 仁宗以 世子居守曹國公李

景隆引兵數十萬圍北平城時城中兵不及萬人

晝夜拒敵數夜使人開門砍敵營敵驚亂自殺或

至明乃定遂退營數十里

實錄今編入  
歷代君鑑

姚廣孝蘇州妙智庵僧也本名道衍讀書能詩天文

地理陰陽術數兵家之學皆造其妙洪武中 詔

選十高僧分侍 諸王廣孝與馬因私謁 文廟

曰若蒙 殿下不棄當奉上白帽子戴蓋爲皇字

也革除初 文廟有意靖難偶出對聯云天寒地

凍水無一點不成冰廣孝對云國亂時危王不出

頭誰作主旣而相與密謀忽承運殿鴟吻墜地

上心惡之廣孝云他要換顏色矣謂以黃易綠也

及出師廣孝常屈守運籌帷幄蓋義師之起實廣

孝首贊助之後官授太子少師封榮國公

李友直北平布政司吏初建文中廷臣有因齊藩不

法遂建議藩國所在更置守臣於是擢張昂爲北



平布政使昺至日求王府細事將不為利友直密聞於上義旅既舉遂擢用之後官至工部尚書

洪武三十二年七月初六日北平布政司吏李友直

青苑縣人首告布政使張昺謀反奉 太宗聖旨昨日

送張昺反詞的吏除他本司官欽此除右叅議前去楊柳青等處拘收糧米及提調宛平大興兩縣人夫挑齊化等門城壕十月南軍圍城同叅政郭資守各門既而聞白溝河聲息又同內使賽因帖木兒等守平則西直等門又差長蘆截南軍運來米及平都司來攻又守禦各門往來通州永平保

定等處守禦及探聽聲息後遼東軍攻通州又同

承奉李謙守門 見楊士奇撰友直墓志

譚淵燕山右護衛副千戶是年七月初六日於端禮門擒都指揮謝貴布政使張昺等官及攻奪九門隨征真定及鄭村壩等處殺敗曹國公等軍馬攻破九門營寨三十四年至挾河搏戰所乘馬蹶被殺

朱能洪武甲戌襲父職燕山中護衛副千戶靖難師

初與帷幄密議惟河間忠武王 張玉 與王與馬時

北平三司之交構造禍者王與忠武建議率麾下



首擒之遂奪九門撫綏城內外三日人心大定引兵攻薊州擒其將都指揮馬宣等遂取遵化永平密雲從上攻灤河旣還從克雄縣首破其東門敵衆敗走追及於月樣橋執其總帥都督楊松潘忠等復追其餘衆於漠州斬獲不可數計乘勝長驅入真定大敗長興侯耿炳文兵時王獨與敢死士三十餘騎追奔至滹沱河炳文衆尚數萬復列陣向王王奮勇大呼衝入敵陣敵衆披靡自相蹂躪死者無算棄甲來降者三千餘人上大悅賜書褒諭永平馳報江陰侯吳高以遼東兵攻城急王

從上赴援高遁走王追及之多所殺獲遂從定大寧戮其拒命撫輯其衆而還時曹國公李景隆率兵攻北平城王從上至鄭村壩與景隆兵遇大戰敗之城中亦出兵夾擊景隆狼狽走王從攻廣昌蔚州大同次第悉下景隆復收散卒號百萬來攻上親拒之王爲前鋒至白溝河敗其都指揮平安軍及申又與敵兵戰大敗之明日王領左哨當前鋒又大敗敵兵盡克其寨柵敵走保濟南王率衆追之至鐔山敵嚴兵列陣以待王連破之敵衆釋兵降者萬餘人王以聞上悉撫而縱之



蓋自是敵兵戴德皆願來歸復無鬪志然 上得  
之即遣還不畱王從攻滄州先破其東門入城斬  
首六萬餘級敵震懼遂獲其總帥徐凱進攻東昌  
敵列陣決戰 上以數千騎出陣後敵圍 上數  
匝王奮力翼上以出進戰夾河王為奇兵先鋒大  
敗敵將盛庸兵又敗平安兵于藁城追奔至真定  
戰其東門斬首萬餘級進畧彰德州遂克東阿東  
平破汶上諸寨設伏泚河敗平安兵十萬餘進戰  
小河為敵所乘稍却諸將遽請旋師獨王力勸上  
行曰用兵未必常勝豈可因小挫輒自沮項羽百

戰百勝竟亡漢高屢敗而終興自 殿下舉兵來  
克捷多矣此小挫何足致意但當以 宗社為重  
整兵前進耳 上撫掌嘆曰爾言深合吾心遂行  
至靈壁敵盛兵迎戰王先登陷陣大敗之生擒其  
副總兵陳暉平安參將馬溥徐真等三千餘人獲  
馬二萬敵眾死者尸蔽原野降者數十萬人悉縱  
遣之進克泗州渡淮敗盛庸兵遂克盱眙下楊州  
從 上渡江入京師後封成國公追封東平武烈

王 見楊士奇撰  
神道碑

張玉洪武末調燕山右護衛指揮僉事癸酉追虜至



系金... 卷一百一  
黑松林甲戌征野人等處陞北平都指揮同知戊寅  
朝廷用讒加兵親藩事急 太宗皇帝舉靖  
難之師帷幄謀畫悉以任王王推誠致慮夙夜不  
懈事可否進止衆論紛紛未定者王正色數語決  
之咸中機宜故凡舉措必咨於王首用王策奪北  
平九門撫順討逆三日城內外悉定帥將南出王  
曰不先定薊州將爲後患薊平餘不足平時薊州  
守馬宣謀起兵迎拒 上命王討之王至諭之不  
下環城攻之宣率衆出戰遂執宣殺之并執指揮  
毛某王知其可用釋不殺送詣北平遂撫軍民是

夜急摧遵化豫戒將士止殺曰師行以得人心爲  
本遂簡敢勇士四鼓登陴開其城門將士皆入城  
中始覺守將率衆拒戰執而斬之餘不殺一人將  
吏悉隨王上謁遂移師永平密雲皆望風輸款從  
至灤河王進曰都督潘忠楊松在漠州阨吾南路  
宜先擒之 上悅隨發兵命王爲先鋒用其計取  
涿州雄縣生擒潘楊時長興侯耿炳文率兵二十  
萬屯真定王自親往覘之還言軍無紀律且其上  
有敗氣無能爲也 上以敵衆我寡欲試諸將勇  
怯召問今舉兵所向具度可必勝否衆未有適說



王曰今當徑趨真定彼雖衆然新集未齊我軍乘勝可一鼓破之 上曰王言合吾意吾倚王一人足辦明日抵鎮接戰炳 文大敗幾被擒獲其左副將軍附馬都尉李堅右副將軍都督竇忠及都督顧成等斬首三萬餘級獲馬三萬復敗安陸侯吳傑軍 上召王諭曰汝之功也非汝與吾意合不及此永平馳報江陰侯吳高等以遼東兵攻圍平城 上與王謀先拔永平既至高等望風棄輜重遁王從 上追之斬獲甚衆王言大寧去此不

遠請移軍襲之可免後顧從之後從攻大寧自辰至午城破斬其都指揮朱鑑執都指揮房寬下令安撫城中頃刻而定北平報李景隆兵圍城遂旋師王請先攻其營然後歸援從之徑搗景隆營大戰三日城中亦鼓譟出表裏夾攻景隆軍不支大敗遁去復攻廣昌蔚州進攻大同悉下謀報景隆收潰卒號百萬且復至王言兵貴神速先事者勝請往駐白溝河以逸待勞可必勝也 上命王率衆馳往駐三日景隆兵至王以精騎馳擊之斬馘無算景隆復大敗收餘卒退保濟南乘勝追擊圍



其城既而解圍還攻滄州獲其大將徐凱進攻東昌敵列陣決戰上以數千騎逸出陳後敵圍

上數匝上已衝擊而出王不知上所在突入

敵陣大戰連殺百數十人王亦被創而歿十二月

二十六日去後以都督同知再追封為河間忠武

王見楊士奇撰神道碑

武勝燕山衛千戶以驍勇著稱壩上白溝河藁城滄

州夾河東昌之戰奮勇當先及大軍至淮先遣公

銜命渡江遂為敵兵所害時洪武三十五年五月

十六日也贈比平都指揮僉事

顧成洪武二十九年陞右軍都督府都督僉事克征

南總兵官既歸靖難師起北方公受命往禦至真

定兵敗被執以獻文皇識公先朝舊人解其繫

與語曰豈非皇考之靈以汝授我乎因語以不

得已興師之故言已泣下公亦泣遂遣人護送北

京令輔仁皇居守時姚廣孝奉命輔居守有腹

心之寄姚素不習兵事與公議多不合會南兵圍

城仁皇於軍旅調度恒從公言城中文武之

臣競進曰顧成南將其中叵測不可專任然公所

言皆合機會用皆有效數命公出將兵固辭使臣



侍左右日陪論議得效尺寸足矣賜公甲冑刀劍  
弓矢皆不受南兵數圍城卒以敗去者多用公謀  
也後封鎮遠侯見楊士奇撰墓碑

李彬濟川衛指揮僉事洪武辛未從穎國公征北虜  
累有擒獲 太宗皇帝居潛聞其驍雄召見與語  
奇之遂隆眷注後領兵駐劄廣昌靖難兵舉公為  
前鋒首率兵攻克薊州進指揮同知攻克雄縣漢  
州進都指揮僉事已而戰真定拔永平下太寧刻  
壩上取廣昌明年鏖白溝攻濟南進都指揮同知  
其冬破滄州明年拆敵單橋擊衆藁城追奪順德

畧地定州進都督僉事冬戰楊村中傷俾還北平  
輔世子居守 上既正位宸極命護 中宮至京

封豐城侯見倪謙所撰傳

孫巖既引年致政而以子亨代已卯 太宗舉義靖

難以公宿將知兵特起守通州是歲南兵大至城  
圍數周起土山臨城攻西門燬樓堞公率眾極力  
捍禦城賴以完未幾兩軍合戰公操戈身先士卒  
大呼陷陣士氣爭奮追奔逐北斬馘不可勝紀得  
饋運船三百餘艘資糧無算以功陞指揮僉事保  
鎮通州辛巳兵復至攻城益急公勵將士登城力



戰矢石雨下敵乃退走陞都指揮僉事壬午春南將平安督遼東兵十餘萬逼城公語將佐曰彼眾我寡若城守不出是示弱也不若及其始至而擊之彼必敗亡乃率敢死士數百犯其鋒而城上亦合勢大呼安眾大潰自是無復來攻者後封應城

伯楊榮撰神道碑

陳珪燕山中護衛副千戶洪武三十二年七月內攻奪九門九月從征雄縣取漠州擊真定援永平陞本衛指揮已而攻大寧戰壩上陞都指揮僉事三十三年攻海洋克免耳山三十四年破楊村大戰通州陞中府督僉三十五年拔薊州追敗東軍于別山遂畱守北平

劉中孚大興縣生員洪武三十二年被選守安定門中心敵臺當年入王府辦事庚辰三月差往保定招撫人民督運糧儲辛巳差同內碯童守通州八月東軍臨城中孚與陳珪等出東門外截殺全勝而還

徐忠以濟陽衛指揮僉事鎮北平日從義旗克密雲雄縣真定永平大寧還戰鄭村壩取廣昌薊州戰白溝河進攻濟南克滄州大戰東昌及夾河攻彰



紀錄彙編卷一百一  
德及攻西水寨克東阿東平汶上大戰靈壁遂從  
渡淮及江至京師以功封永康侯

薛祿以戎伍從攻薊州遵化援密雲攻雄縣追敵漠  
州戰真定生擒敵左副將軍駙馬都尉李堅陞燕  
山右護衛指揮僉事從援永平下大寧富峪會州  
寬河時南兵已圍北平城祿還先遇其哨騎薄戰  
敗之 車駕繼至從戰鄭村壩敵大敗陞指揮同

知從克廣昌蔚州攻大同率兵前哨獲敵人馬遂  
從南征大戰白溝河追奔至濟南陞指揮使從克  
滄州大戰東昌祿以五十騎前哨遇敵兵數百與

戰敗之獲馬三十餘匹敵悉衆來追復奮戰大敗  
之敵伏兵以邀旋師皆擊走之從戰夾河大捷戰  
滹沱河右軍力屈祿率衆馳赴之出入敵陣數十  
合戰敵敗走追至夾河斬首無算明日戰單家橋  
祿馬蹶爲敵兵所得拔刀斬敵兵復上馬督戰遂  
敗敵將平安軍以次攻下順德大名彰德及攻西  
水寨生擒敵都指揮一人斬獲尤多從攻東阿東  
平汶上皆下之繼戰淝河大店小河汴堤靈壁遂

渡淮渡江入京師後封陽武侯

楊士奇  
撰墓碑

陳賢以護衛指揮僉事攻奪九門從克

雄縣漠州



其年冬陞北平都司僉事已而援永平敗敵于海  
灘退敵于塔河解通州之圍三十四年十月陞右  
府督僉三十五年仍居守于北

陳宣字彥純合肥人以都督率兵具舟迎濟 上正

大統錄功封平江伯 見楊士奇撰神道碑

吳中為大寧都司經歷 太宗師至大寧公以衆出

迎 上一見拔於羣衆賜衣命守會州南兵攻城

率衆卻之移守薊州遂命署北平布政司理問陞

經歷給餉運督城守後官至少保工部尚書 見楊士奇

撰墓

金忠僑居北京二十年 上初舉義靖內難公布衣

入見署紀善遂從征伐明年署長史後官至 部

尚書 楊士奇撰墓志

徐增壽中山武寧王達之次子 文皇靖難之初有

翊戴功而竟死非命初追封武陽侯進封定國公

子孫世襲謚忠愍 初增壽兄魏國公耀祖實與齊黃之謀而增壽獨以百口保

文廟無他益輝祖盡忠於建文而增壽宜力於文廟故今兩公並傳

洪武三十五年九月初四日 制封奉天征討官

都督僉事丘福為中府左都督淇國公

都督僉事朱能為左府左都督成國公



以上俱奉天靖難推誠宣力武臣特進榮祿大夫右柱國食祿二千五百石子孫世襲

都督僉事張武為中府都督同知咸陽侯食祿一千五百石

有僉事陳珪為後府都督同知泰寧侯食祿一千二百石

為中府左都督武安侯食祿一千五百石

為右府都督同知保定侯食祿一千二百石

為右府都督同知靖安侯食祿一千石

都指揮王總為中府都督僉事武城侯食祿一千五百石

都督僉事徐忠為前府左都督永康侯食祿一千五百石

張信為隆平侯食祿一千石子孫世襲隆平伯

李遠為中府都督同知安平侯食祿一千石子孫世襲安平伯

郭亮為左府都督同知成安侯食祿一千二百石子孫世襲成安伯

石子孫世襲成安伯

以上俱奉天靖難推誠宣力武臣特進榮祿大



系金... 卷一百一  
夫柱國子孫世襲

都督僉事房寬為思恩侯食祿八百石子孫世襲

指揮使 無階勳

右都督顧成為奉天翊運推誠宣力武臣特進榮

祿大夫柱國後府右都督鎮遠侯食祿一千五

百石子孫世襲

都指揮使徐祥為興安伯食祿一千石子孫世襲

都督僉事徐理為武康伯食祿一千石子孫世襲

都指揮僉事李濬為襄城伯食祿一千石

都指揮同知張輔為信安伯食祿一千石

都指揮僉事唐雲為新昌伯食祿一千石子孫世

襲指揮使

都指揮使孫巖為應成伯食祿一千石子孫世襲

都指揮使房勝為富昌伯食祿一千石子孫世襲

指揮使

都指揮使趙彛為忻城伯食祿一千石子孫世襲

都督僉事陳旭為雲陽伯食祿一千石

都督僉事劉才為廣恩伯食祿九百石子孫世襲

指揮同知

以上俱奉天衛宣力武臣特進榮祿大夫柱國



都指揮同知張玉追封奉天靖難推誠宣力武臣  
特進榮祿大夫柱國英國公謚忠顯

都指揮同知譚淵追封奉天靖難推誠宣力武臣  
特進榮祿大夫柱國崇安侯謚壯節

曹國公李景隆為奉天輔運推誠宣力武臣特進  
光祿大夫左柱國太子太師曹國公增祿一千  
石通前四千石子孫世襲

兵部尚書茹瑄為奉天翊運守正文臣特進榮祿  
大夫柱國太子少保兼兵部尚書忠誠伯食祿  
一千石以給本身

都督同知王佐為奉天翊運宣力武臣特進榮祿  
大夫柱國中府都督同知順昌伯食祿一千石  
子孫世襲指揮使

都督僉事陳瑄為奉天翊運宣力武臣特進榮祿  
大夫柱國右府都督僉事平江伯食祿一十石  
子孫世襲指揮使

谷府護衛指揮僉事張興為驃騎將軍都督僉事  
儀衛正張成為驃騎將軍都指揮使  
駙馬都尉王寧為奉天輔運推誠效義武臣特進

光祿大夫柱國駙馬都尉永春侯食祿一千石



子孫世襲

都指揮譚淵男譚忠為特進榮祿大夫柱國新寧伯食祿一千石子孫世襲

紀錄彙編卷之一百二

國琛集上卷

唐樞

櫻山文庫

劉基括蒼人博學精象緯志切安攘著郁離子書始謁太祖以天道後舉者勝一語契之遂置幄中多所咨受以成大功公性剛毅慷慨有大節論天下安危則義形於色知無不言每遇危急真氣勇發計畫立就人莫能測其機太祖常稱為老先

生而不名且曰吾子房也封誠意伯

李善長定遠人太祖初起兵畧滁陽途逅與語稱



旨遂置幃幄俾掌書紀已而郭子興欲援入麾下公強不肯行自是終其官典中書省密議褒然爲羣寮之長凡軍機饋餉開國大制度悉所贊畫及推戴稱王立帝度德相時識歸真主爲天下臣民先後累陳胡黨暴卒員外王國用少卿陳汝輝疏伸其寃 太祖感悔

陶安當塗人 太祖初渡江迎謁軍門勸取金陵期以帝王救世之功定鼎後開禮樂二局首命公爲學士一代典章悉所從出其開國儒臣之宗乎李習朱善吳沉王逵王景朱升蘇伯衡危素黃縉徐

一夔鮑恂劉仲實劉三吾詹同葛鈞潘廷堅秦裕伯陳桎李紳張以寧牛諒貝瓊或辭勝不適因或才局不善通或成見自是或隘噐難伸或老歲不競皆出公之亞焉

取天下在識勢運天下在識事定天下在識本三識備以符翊真主是故有一代之興必有一代之佐劉以後先着屈羣策李以國老和羣將陶以儒術飾吏事皆真主所先具而能兼用之者也精蘊未緘子房無以辟穀不免惟庸毒殺之慘韓國先老幾矣而志綠業識依違時輩終



紀金身經卷之一百二  
見所累姑孰以經義掩大用自知三所不如尋  
亦出守令行省無以昌其所業識天下而輕自  
照其惟智者之千慮哉

武寧王徐達鳳陽人 太祖起義兵首謁麾下其動  
靜語默悉超羣英乃命爲帥長從渡江定金陵樞  
運四征輦麾百戰自西自東自南自北謀無所不  
成攻無所不克王言簡慮精命出不二諸將敬諾  
神明所至攻城不屠受降不殺成功不矜至封姑  
蘇之府庫置胡宮之美人財寶不以取忠志無疵  
非人所能同日语也

忠武王常遇春懷遠人忠信智勇膂力絕世佐 太  
祖飛渡大江霆擊電掃東南郡縣以次削平旣復  
下宛豫遂議北征至通州禁侵暴務安輯人不知  
兵市不易肆皆愛戴之如父母乃進收燕都尋平  
河東入秦復率師破開平大俘獲以還

武順王鄧愈泗州人勇力過人能奉法以惠恩恤下  
從 太祖渡江命守廣德謝長鎗寇城大敗之移  
戍宣州領兵克徽州破苗楊攻師十餘萬遂取嚴  
州畧浙江臨安大敗張寇於閑林寨擊走僞漢部  
將命守饒州討陳友諒於江州乃下江西留鎮之



復出鎮襄陽西抵巴蜀北控河洛大敗王保保於  
定西南平溪洞窮追番部至崑崙山而廣德宣州  
徽嚴饒撫南昌襄陽八州民懷德獨深

岐陽王李文忠盱眙人 太祖之姊之子年十二無

母鞠於 太祖即能事戰初守畧池太及浙江杭

嚴東拒僞吳西當僞漢會金華苗獠殺胡大海王  
率兵趨逐吳以二十萬衆寇新城王與戰衝突敵  
陣中格殺潰之尋提兵北伐獲元皇孫宮妃復移  
鎮西蜀已而副中山王驅馳山後至白登三不刺  
攻大寧高州大石崖皆克之王釋兵家居恂恂若

儒士尤耽羣籍聲色之事澹然

襄武王湯和鳳陽人驍勇饒智畧始從郭子興 太  
祖取和州遂委心奉之從渡江克常州江陰平姑  
蘇諭降方國琛殄姚大膽畧定閩中諸郡同中山  
宋國北征趙代復下蜀討五開山獠王臨陣決機  
有語及兵法輒笑爲泥古又善繕甕城郭海上多

遺世澤

昭靖王沐英鳳陽人八歲歸 太祖憐其孤幼以子

鞠之年十八出鎮鎮江綽有聲績內托肺腑外秉  
節鉞以麾諸夏南平閩越擒陳友定西畧崑崙遠



涉流河掀牂牻踏夜即蹂烏蠻生擒段世下車里  
八百平緬皆虎視以雄遂畱鎮之王以仁智爲理  
闡庠序以示禮迪官常以示制均政役以示安周  
撫集以示揀破思倫法以示怒泣俘馘以示恩諸  
部懷仁服義豫附輯欵收其土貢以克軍實

六王元祀開國奏膚表表無以尚之以鋒鏑莫  
若行伍以行伍莫若幃幄以幃幄莫若神武而  
不殺是故有取焉聖人以此洗心退藏於密益  
復有可言者乎濟濟多士揮霍慶突曾是不少  
則非所急聞也敢僉列如左洪武三年大封功

臣公六人李善長徐達常茂李文忠馮勝鄧愈  
侯二十八人湯和唐勝宗陸仲亨周德興華雲  
龍顧時耿炳文陳德郭子興王志原鄭遇春費  
聚吳良吳貞趙庸廖永忠俞通源華高楊璟康  
鐸朱亮傅友德胡均美韓政黃彬曹良臣梅思  
祖費聚十七年所定功次功高望重曾總兵者  
八人徐達李文忠鄧愈湯和馮勝沐英耿炳文  
吳良專簿書而聽指示一人李善長以義氣而  
功封三人鄭遇春王志原費聚隨軍征討有功  
十九人周德興郭子興趙庸仇成李新俞通源



系金身錄卷一百二  
謝成張德吳貞江興祖陳桓張赫朱壽廖永忠  
陳德顧時唐勝宗陸仲亨華雲龍自建功者十  
五人傅友德藍玉葉升曹震張溫王弼郭英曹  
興周武吳復金朝興薛顯胡海張翼朱亮祖因  
父而封四人常昇康鐸陳輅濮瑛來歸者七人  
韓政曹良臣楊璟陸聚梅思祖黃彬胡均美然  
得與功臣廟祀惟二十一人徐達常遇春李文  
忠鄧愈湯和沐英馮國用胡大海趙德勝華高  
張德勝俞通海吳良吳貞康茂才曹良臣吳復  
耿再成茹成孫興祖其至今子孫得襲封爵者  
惟黔寧中山兩氏餘皆廢罷

長史桂彥良通經史百家言嘯嚕儒學洪武六年被  
徵白衣賜宴諮以治道對曰道在心心不正則好  
惡頗而賞罰差太平未有期也屢援經訓獻納  
太祖每稱善有以墨敗官者處死力諫當如律又  
問法行數犯曰用德佚用法勞嘗進 皇太子心  
圖及上太平十二策 太祖曰卿帝者師也

陳遇金陵人博究經史有治才 太祖召見禮甚稱  
先生而不名日侍幃幄坐久必賜宴間命廐馬送  
歸車駕三幸其第先生竭心攄悃所獻替悉保國



安民至計授學士者再固辭授侍郎固辭授禮部尚書又固辭乃不復強之以官欲官其子亦辭謝眷待之隆亞於勲戚

陳雅言未豐人爲人明粹剛直有用世之志窮研經史爲文章克行有格氣慷慨尚義能急人之困損所有而不恤洪武中爲教諭

章溢龍泉人弱冠從王叔剛游明用世之學數以布衣集鄉族以捍大患及見太祖擢僉營田司事

巡行江東兩淮僉浙江湖廣按察司事命征八蠻守處州隨職效勤事咸中其區畫及議分屯料阮

德柔設水軍所計文忠取建寧不爽尺寸惜不爲大用今當安攘之寄任其馳驅耳官至御史中丞許瑗諸暨人好學秉志能以忠信許人且識攻取之術以儒士謁太祖因說曰方今元祚垂盡四海鼎沸豪傑才勇之士勢不獨安有勇畧者可以馭雄才有竒識者然後能識竒士閣下欲掃除僭亂非收攬英雄難以成功太祖深然之命爲博士尋守太平僞漢陷太平許不屈死之

志士騰才不可以無具經義之爲功大矣而迂儒泥古不以爲是心注脚則豈善窮以致用哉



桂陳乏施章無大用而許以殞滅後世疑其泥焉然而其爲具自在矣 太祖以不碍之心隨在聽而取之其亦一時之馮翼哉

學士宋濂金華人少慕古人之學研究經史析理精微而泛濫於百家言悉得其旨要乃發而爲文雄麗溫雅浩然不息元末避亂龍門山太祖徵至甚眷之命司制作一代典章文物承旨揮次皆傳後大紀述天下無賢愚識不識企之日本得潛溪集刻板國中高麗安南使購公文不啻拱壁公坦重任真不忤物爲人給亦不較

待制王禕義烏人屹然有奇氣人初見若不敢卽一言言之入則情義藹然於經史百家無不究其極其爲文宏麗沉雄 太祖初渡江禮任之洪武五年使雲南諭降梁王辭嚴義正梁君臣駭顧已有降意會元使脫脫以徵餉至欲連兵拒我乃以危言迫梁王拘匿歲餘殺之

吳伯宗洪武開科狀元金谿人性勁直不回忤胡惟庸坐謫鳳陽上䟽論時政指斥惟庸罪狀不宜獨任以政召還尋忤旨復謫教諭亦召還拜大學士尋復以事累降檢討初業舉識者見其文嘆曰此



兒玉光劍氣終不能掩後果克然

侍郎曾魯新淦人七歲能暗誦九經稍長泛濫史籍  
凡古今國體治亂人材忠佞制度沿革悉能言之  
有邛之者如山川出雲層見疊敷十九謁虞伯生  
知博而反說於約 太祖起公脩元史當羣言沸  
騰公歷舉傳記答之時謂公能以舌爲筆宋潛溪  
以筆爲舌

胡翰金華人學博無所不究爲文章明潔簡峻論議  
出人意款句灑然不落空俗之態雅好泉石幅巾  
短杖著書以自樂有勸之仕劇謝之太祖聘致授  
衢州教授預修元史初學古文於吳淵穎萊憫宋  
潛溪攻舉子業移書招之同學

趙撝謙餘姚人雅追古學欲探造化之原洪武十二  
年聘至京修正韻與僚官不合歸二十二年再徵  
起教授瓊州作瓊臺布學範傳六書本義聲音文  
字通授造化經綸圖說集補前聖戒書隨物書之  
以興起斯文爲已任蠻俗自茲向風矣

人文以華國炳炳朗朗郁郁彬彬夫豈什藝之  
絺繪哉後世枝葉於言則何以利攸往也茂州  
之役三市街之慘使越而圖之尚或有處北山



三黜之羈玄探強記之勞皆未昌其所展然巋  
乎成家天啓以翊初運則烏乎可氓耶

宋納大名人動循矩矱不妄言笑洪武十三年徵詣  
公車授助教橫經發難擊節廓塞學者如客得歸  
歷陞太學士會國學成生徒日夥而識主者往往  
巽悞師生相訐教尼不行 高皇簡命公爲祭酒  
公釐正宿弊倡學規立師道提挈鏗礪不遺餘力  
當開國初博聞摘藻出宋公上不少公獨能得  
士得君考諸監規尚在也 而垂訓迄於今爲烈  
信在此而不在彼

魏觀江夏人讀書勤苦不輟僮有治材 太祖初  
辟入詞垣多所制述擢祭酒尋謫縣令後守蘇州  
時懲陳寧苛政戎事倥偬百物彫耗禮文衰落公  
能力挽躬率風教勃興課績爲天下最後以御史  
誣劾興士誠旣滅之基遂罹害太祖卒悔之命所  
在致祭哀賻有加

尚書錢唐象山人任真有耿槩嘗被召講虞書陞立  
有糾之唐曰陳古聖言不跪不爲踞諫宮中不宜  
揭武后圖忤旨待罪午門外終日 太祖悟賜飯  
并撤圖



陶屋仲鄞人清介自持洪武中為按察使專治賊吏  
布政使薛大方貪暴亦按其狀劾罷

才不可露露必有有我之勝勝則氣召而軋之  
軋則窮其不窮幸乎

徐舫國初桐廬人戴黃冠服白鹿裘腰縮青絲繚性  
尚風義章綬不能縻自幼有俠氣視法度士如無  
物已而悔受章句綦輒操觚爛然已而復悔是蠹  
書魚也人生貴適意乃放浪山水歌吟於雲烟出  
沒之間與江漢淮浙名士相摩切人莫測其涯際  
宛陵故人羅氏率五百指來避兵輒衣食之病為

注藥成為殯葬久且弗懈事平具送還其家

王冕越人磊落有大志穿曳地袍翩翩行兩袂軒翥  
下東吳渡江入淮楚北抵燕都歷覽名山川搜訪  
竒才俠客談古豪傑事呼酒悲歌隱山谷中著書  
一卷坐卧輒隨秘不使人觀曰吾未即成持此以  
遇明王當佳風日一賦疊疊不休皆鵬騫海怒讀  
者聳毛髮天大雪赤足上潛嶽峯四顧大呼曰遍  
天地間白玉合成使人便欲仙去 太祖致冕幕

府授諮議叅軍尋卒

杜環金陵人侍父宦游好學飭謹重然諾好周人急



父執主事常允恭歿於九江家破母張氏老投允  
恭知交無所納訪歷至杜懸鵝菴雨謁之杜禮迓  
固留養杜貧黽強率其妻馬氏敬事母母性褊急  
少不愜輒詬怒杜私戒其家順之勿以困故爲慢  
卒則爲塋且時祀馬杜後補旨王府錄事

洪武末姑蘇三高士王賓韓奕錢芹時郡守姚善右  
賢請王陋巷自述名以候王報謁至府門再拜而  
返守追迎王曰非公事不敢入也又將候韓韓先  
入避太湖守嘆曰韓先生面得幸承乎又紹介候  
錢錢請伺月朔胥會於學宮至則出一簡授守乃

守禦制勝之策守嘉尚後薦爲行軍司馬

高啓吳縣人攻苦力學詩追唐大家文亦汪洋麗則  
張士誠據姑蘇公避居吳松江日詠歌自適與時  
俊楊基張羽徐賁王彝杜寅張憲周砥王行宋克  
輩遊尤好權畧論事數中肯綮 太祖召充兩制  
史館授編修擢侍郎乞歸復居江上銳志不少衰  
以故人魏觀爲其郡守坐誣以連歿

花雲懷遠人驍勇絕人歿已仗劍謁 太祖於臨濠  
甚竒其才命將兵蹀躞羣盜若走貔流電復察公  
忠義可信任命宿衛左右後守太平城陷僞漢縛



公急公奮身大呼縛解起奪守者刀斫五六人遂  
碎公首縛於舟檣衆射之至死罵不絕口

張飛卿無錫人氣岍孤騫面如頰玉盤雙瞳炯炯照  
人見有媚側雖達貴人必面折其當孝義恭儉若  
俯然有甚畏者嗜學愛孟子養氣章反復爲子姓  
誦之援毫爲聲詩爽爽國初胡豫章圍無錫吳將  
莫天祐不肯下傳令屠其城張奮身往來胡莫說  
解所全活數十萬人

孔子不得已而思狂彼其浩通遐覲嚶嚶古人  
以爲躡聖有地吾弗能已得免文宣之戚乎若  
王生冕當表而列之一至梅花屋爲竟日之談  
無及矣異世耿耿

姚善安陸人洪武末守蘇州時承夷僭靡習豪室後  
用尚明法以整之噐者或更籍持短長賊譎盜起  
善洞達政體周合人情張弛寬密各協事宜由是  
吏民顧名檢率圖趨義轉稱大治爲列郡寂靖難  
兵至抗大義以死

練子寧新淦人洪武乙丑對大廷卽極言朝失無忌  
避 太祖嘉之擢第二自少以名節自砥礪聲望  
蔚然一時以文學行誼歸之建文拜吏部侍郎多



所建白尋改都御史靖難兵起廷斥李景隆賣國  
秘謀後以不屈族誅姍戚被逮論死者百五十一  
人戍遠方者數百人

鐵鉉鄧州人初爲五軍斷事奏對詳明 太祖喜之  
每法司有疑獄久不能決者屬鉉片時而成尋擢  
山東叅政靖難兵至城圍月餘不下忽以計寤  
文皇甚知不能克乃棄去後登極擒至今一顧不  
可得去其耳鼻亦不顧碎分其體至死尚詈聲喃  
喃也

陳廸宣城人通經術有志操任雲南布政大著軍績  
陞尚書疏議清刑獄集流民免獍租皆切政體靖  
難師起被命督軍餉卽陳論大計及文皇登阼罵  
不屈同子鳳山等六人就戮乃熬鳳山鼻令人食公  
尤肆指斥

悉古死事多烈情癖直卽乏縝思以達授政乃  
若兩得之不尤見其從容酌就乎可與共學可  
與立

方孝孺寧海人讀書務精思力踐擔荷綱常羽儀斯  
文凜乎其不可扳其爲文辭藝森蔚千變萬化不  
主故常而義意濯然常新一時士類推服建文倚



重之靖難兵入以衰經哭禁掖夷其族死者八百四十七人

甚哉死生之際之難言也公能篤信而未嘗不好學能守死而未嘗不善道然則其至焉否乎吾不得而知之也造化孳根不經不史不灰不生不文章不節氣古三代之英宇宙一掬故先灰事而盡其生色相太虛故隨所學而藏其用天人同源故致其道以畢吾性公英魂入天以繫風紀若正學不墜地以爲學士憑則尤快也又曰嘗見許給舍談及革除事輒泫然悲之以爲諸公只劇知了自己灰事因言吾鄉嚴尚書後事而灰或老成用意不徇日月耳安知其無所存者乎又曰時侍讀樓璉當遜志處決後繼召樓入惶懼受命歸語其妻曰吾將以全爾輩及夕自經死是有所存者樓金華人

高魏遼州人宕軼負奇氣論事欲治其先萌建文初諸藩釁未作疏論時政借漢以爲喻效賈誼太息欲定經制執幾先以全親厚極數千餘言人未以爲的言及靖難兵起願使燕軍上書亦極數千餘言懇懇陳說大義曲爲分處慷慨從容奮不顧危



禍書再上不報 文皇臨御自縊驛舍死

黃子澄分宜人少務學有俊聲建文初爲太常卿諸藩不靖公朝夕弔勉與本兵協圖靖難師起遣將調兵多出指畫及大將李景隆敗奔公哭諫當特誅不聽已而徐凱盛庸相繼敗顧民等降公拊膺大慟曰大事去矣後以北檄攻公急借謫南徼以圖募 兵文皇踐阼族誅一子易姓田奔咸寧

齊秦溧水人建文中爲兵部尚書初 太祖召公問

邊將姓名公歷數無遺又欲考諸圖籍公出袖中手冊甚悉 太祖太漸將傳位建文公預愛顧命

靖難兵起公戮力竭心五內闔外嗣君惟召學士輩討論周官法度處便殿弄柔翰事遂不可爲矣 廼族誅

景清真寧人氣倜儻擔負大節民有女爲妖所憑公館其家妖不至乃書景清在此四字粘其戶妖竟滅 文皇御極死事者甚多公爲都御史獨晏然侍朝人以其素少之一日早朝星者奏文曲犯帝座甚急 文皇意固疑公及見公着緋衣遂檢之而得所帶劔不屈而死

紀善周是脩博學富著述有孝友忠信之行非其義



不苟取靖難兵起陳論大計及指用事者誤國眾  
共讓挫之屹不爲動 文皇師駐金川門宮中悉  
自焚乃留書其家別其友江仲執解縉胡廣蕭  
楊士奇付以後事入應天府學自縊死

高之死死先見者也黃之死死勤王者也齊之  
死死忠事者也景之死死報讐者也周之死死  
仗義者也時則有若侍郎卓敬給事中陳繼之  
御史曾鳳韶長史陳通皆先見馬而死編修王  
叔英拾遺戴德彝少卿胡閏尚書侯泰侍郎黃  
觀郭任經歷宋徵給事中韓永知府陳彥回知

縣顏環皆勤王馬而死侍郎陳性善知縣顏伯  
瑋鄭恕州判鄭華都指揮馬宣朱鑑皆忠事馬  
而死尚書張統給事中黃鉞廉使王良都御史  
程本立茅大方御史高翔甘霖魏公冕少卿廖  
昇寺丞鄒公瑾教諭王省舉人劉政教授陳思  
賢皆仗義馬而死

姚廣孝長洲人從釋氏學善詩文炯有謀畧太祖命  
十大高僧分往各藩府勸善公適至燕藩住慶壽  
寺時 文皇已有密謀心許公可托不敢言試公  
一聯天寒地凍水無一點不成冰公卽對曰世亂



新金匱要略卷一百二  
民貧王不出頭誰作主遂稱旨置幄中几檄遣機  
向悉公指受賜今名官太子少師封榮國公謚恭  
靖

佛久傳而失其宗旨故後世號名其家者盡事  
寂遺棄人間事而佛之教遠矣孰知其所謂寂  
特靜明正覺以肇世修豈外人道自滅以求性  
哉夫佛之爲言覺也諸法實相名員滿覺生天  
生地生人生物只一點靈光不息儒與佛同之  
故能主宰宇宙紀綱民物纔無量功德圓滿彼  
直以頓門教異於儒直下卽見性却墮日新之  
學故非上乘根不能以小果責報分然一有證  
悟造化隨在入手恭靖者已闖其門稍稍得力  
夫豈小兒羊鹿之機耶高僧爲道衍似杞來復  
宗泐慈容廷峻懷渭子梗道衍卽恭靖法號  
太祖親授齋崇禱寺設無遮會

胡廣大學士謚文穆吉水人 太宗簡入內閣七人

以公爲首推論思宥密十有七年始終一節而輔  
導東宮扈蹕行幄時各有發明有請封禪者公作  
頌却之其纂修克總裁官鋪揚文治爲一代大典  
胡儼南昌人博學爲文尚純實 太宗簡入內閣有



顧問必從容審度而後陳不才智先人及兼宮  
寮所對皆切人情後擢祭酒公自處澹素謹於報  
施遇可否利害必擬議以求至當群論中有不合  
卽引退不與辨以故所至能全交

解縉吉水人自幼穎悟絕人宏才浩志爽闊通捷其  
爲文辭勁意精不經慮語出口人輒不能到 太  
祖寵眷大庖西室進疊疊萬言拜御史 太宗簡  
命入內閣改學士命評侍朝十臣咸切當及密議  
建儲公以正對淇國公丘福泄其議漢王遂構公  
外補尚書李至剛復誣公怨望逮繫死獄中

文閣初延睿遴訪恣七俊遇翔於霄漢之表而  
兀無所祖豈直以健翮乘風雲上乎孔子曰色  
斯舉矣翔而後集要亦有縉蠻丘隅者在二楊  
尚矣文穆以無機而通東湖以薦實而慎故李  
永終譽黃文簡金文靖亦能免於其世而大神  
儁英百倍俗輩乃竟墮時網撫世酬物之機奚  
俟深長思耶

楊士奇泰和人少師謚文貞爲本朝文賢獨步立朝  
務大體蘊藉從容事無不舉而卒不失其正汪如  
也不可以偏長日凡以名節政事文學聞於世者



舉不越公度內其寵遇亦無過之在內閣四十餘年正統七年卒

文定公楊溥石首人以文學潤飾太平大制作咸出其手時號三楊以文貞爲西楊文敏爲東楊公爲南楊云公永樂中爲洗馬下獄十餘年家人供給數絕糧又朝命叵測囚圜厲志讀書不輟同難者止之公曰朝聞道夕死可也公爲人謙雅無大小無敢慢初鄉試首選考官胡儼批其文他日必能爲董子之正言而不學公孫弘之阿曲後果如其

言

文敏公楊榮建安人器識通敏擁佑三朝永樂中有邊急三命公往其肅計之及辨解李夏之怒已政和麗水之征棄交趾平高煦扈從廵邊之駕秘祭塞外之喪治平靖難能不繁餘力而疏闔自飭無大小歸心焉

少保黃福萊州人才識憂不凡而忠貞足以居之以衛經歷上書論國大計 太祖奇之陞侍郎永樂中陞尚書令撫交趾兼綰藩臬章公政猷惻怛視民若已子勞輯訓飭通其好惡新拊之衆依依不忍釋 仁宗召公還號泣以送未幾復叛復命公



往平之 宣宗朝舊臣依違承順公持正不阿命  
觀戲圍棋皆以正對不擅從正統初參贊軍務憂  
國愛民老而彌篤謚忠宣其歷官俸餘悉分贍嫻  
族

忠定公蹇義巴縣人初授中書 太祖命朝夕左右  
者九載公謹事愈篤永樂初擢冢宰時欲盡釐見  
行款例公從容陳說本末 文廟以公忠實從其  
言嗣兼宮僚留輔監國公政體明達孜孜啟諭無  
倦及命兼禮部事撫巡應天雖職務填委處之裕  
如公於仁宣二廟靖獻密勿量擴交與未嘗一語

傷物

尚書夏原吉湘陰人謚忠靖雅度能肩物臨政善酌  
大體筮仕工部若老吏同官質疑者日環左右嗣  
經畧南服董辨工材隨在必效成績及輔導儲宮  
扈從行駕特於公倚重至命統署數章其預 仁  
宣廟宥密泯不能迹公而事各就公籌公阻 文  
廟北征及定國恤從征漢庶人倉卒酬理若平居  
坦然

陳敬宗慈谿人莊持好禮善論議 容止沉潛於經  
史百家生平所自負於人鮮所推讓爲文雅厚而



暢永樂宣德間居大學一十七年以斯文自任常會食諸生稍有失儀卽不宿公善飲至酪酏猶自儼然若未嘗飲者人服其德隅

文端公王直泰和人 文皇往來北幸或留輔或扈

從正統景泰間任冢宰已巳車駕欲北征公率廷臣上疏極諫不從明年議迎駕公以正對興安蓋不爲世阿者也時與金谿文安公王英齊名公號

東王文安號西王論者以二公德業各如其名

胡濙武進人不治皎能以其意周旋事爲必得其正乃已人終其身不予知克其心蓋無悔也初爲給

事中 太宗察公忠實命巡訪異人公歷久還報

賜坐語四鼓時睿意有所屬公力保護其間正統

初提學黃潤玉行部田州遇建文云彼時胡濙假

尋張辣捷實尋我縱我入蜀久遊雲貴至此遂傳

送至京 仁宗爲監國值有飛語 太宗命往察

之公密疏七事表其誠敬孝謹 仁宗頗致疑不

大用公及閱舊章得密疏乃明公爲禮部尚書給

事中林聰忤權貴坐死公移病 景皇帝遣問之

公曰聞聰事心悸成疾聰遂得末減

平江伯陳瑄合肥人謚恭襄累立戰功永樂初歲董



北京海漕百萬建倉尹兒灣城天津衛籍兵萬人  
戍守築淮楊海隄八百里尋罷海運浚會通河通  
南北餉道疏清江浦以避淮險設儀真瓜州埧港  
鑿徐州呂梁洪築刁陽南旺湖堤開白塔河通江  
築高郵湖堤自淮至臨清建閘四十七建淮徐臨  
通倉以便轉輸置倉卒導舟設井樹便行者公微  
密綜理善任使均勞逸秋毫不取於下故能倡此

永利

本中永樂中知吉水縣能以簡御煩民樂其政操  
寺甚堅門無私謁去任民思之不忘後復來民歡  
迎如嬰兒見慈母卒於官民乞留葬本邑爭肩土  
以營封墓

論本朝人物至三楊黃夏諸君子輒舉手加額  
見名臣像不能不歎容有而信決善惡之機擬  
乎自樹豈不偉耶嘗與萬文憲語因舉論語善  
人章析解予曰善人非質美能舉其質之美者  
也人性皆善人善皆可欲可欲而不欲則受變  
於俗受變則不有諸已能使其已自有非致力  
循情不卽舍而去乎萬曰然則善人學矣予曰  
否學則不自有其有故能善與人同以其所有



而復取人之有以爲有是以日新富有其優入  
不可量故善人道實學者心虛實能立本虛能  
受物立本可知可行受物可久可大萬曰然則  
善人瑣乎予曰否道莫大於善矣大聖神善之  
所結也曾外是而復有加焉者乎

廣寧伯劉江總戎遼東謀畧不凡永樂十七年倭艦  
三十餘直逼望海埚入寇劉不經意只餉師抹馬  
率其部爲伏約以識號賊至大勝之斬首無筭師  
塚遁合開西壁縱之復夾擊生擒數百海上倭艦  
敗無踰此者

戶部主事王良特達豪邁負機畧有御衆才太宗知  
其名委督餉口北威服上下雖英國值出師亦屈  
勢相迓後有部堂繼董乃事無能比也

周新南海人永樂中爲御史彈劾不避權要知無不  
言雖屢犯天威言愈懇切朝野咸畏之私稱爲冷  
面寒鐵公或有怖小兒曰冷面寒鐵公來輒匿去  
擢長浙藩憲風裁益揚屬吏皆股栗儔案相變爲  
澹素有錦衣使浙受贓公捕之被誣訴於朝械公  
至御前猶猛白其狀不已命肆諸市是夕奏文星  
墜 天子悔之



鳥墮鷲魑怯狸魚之畏獺也豈盡以其力勝哉  
先有奪其氣耳雄者能服人心類此然以善服  
人不若以養是故久而有窮其不窮幸乎

顧佐太康人爲御史轉按察副使召爲府尹守正嫉  
邪吏民畏服 宣廟朝爲左都御史時競侈靡仕  
習援聲妓婪墨成風不爲異公剛直不撓糾肅百  
僚雖豪貴置之法朝綱大振論者擬爲包孝肅天  
下想聞其風采

字時勉安福人謚文毅老成修潔剛正任事永樂末  
殿災公在翰林陳十五事皆中時病後復言事

忤旨繫獄洪熙初直言進諫命力士錘十數爪不  
死未幾又言事下獄 宣宗召復其官一日懷金  
錢至史館撒地令諸臣拾取公獨正立 宣宗以  
袖中餘錢賜之正統時爲國子祭酒教化大行爲  
王振所怒構以罪枷於監門諸生羣疏願代之  
人苟爲善則信有諸已無賴於所遇

尚書周忱吉水人謚文襄宣德中始巡撫南畿前後  
凡二十二年督理歲漕鑄鐵量定支撥減重額徵  
稽羨餘立綱運處蘇揚鹽利計賑濟修圩塍疏水  
利均加耗以舒貧乏置編囤以革逋欠立改兌以



省冊費建倉廩以便搬貯處草折以易輸送定金  
花以抵京俸起布式以釐奸僞收帶徵以禁馬頭  
公謀慮深長善採衆論故巨細綜畫東南賴以晏  
然

文襄下心體物博詳輿情建南服永利幾於不  
自有可以謂取善乎曰以其事取諸人者也卽  
其治漕雖聖賢之道何以過此曰禹治水后稷  
教稼穡同乎曰禹稷之心無其事之心也能以  
無其事取善然後爲性學曰自耕稼陶漁以至  
於帝無非取何如曰舜豈取耕稼陶漁及帝事  
哉隨在以正其心聞一善言見一善行其心若  
決江河沛然神通莫之能禦也

况鍾靖安人宣德中知蘇州府至則舉屬僚胥卒不  
法賢豪右恣侈者繩利不少恤奏減重額虛徵糧  
合一百二十萬餘辨釋誣入軍千八百餘復逃戶  
三萬六千七百餘他如種種興革皆紀綱大務正  
統五年滿績郡民羣八萬餘扣闕請留乃再任七  
年卒於官民哀之若喪父母

時尚制科謏稼業况政特至是極乃起家吏員  
卓哉維修信無賴於所起



張宗璉吉水人宣德中常州同知廉介寬厚鞭策不  
施而事無不舉有清戎御史峻法誣民爲軍張堅  
執不隨卒之日衣衾不能備民老壯奔哭於庭  
皆極哀

侍郎王質博通今古廉約自持宣德中自爲御史至  
藩省每蔬食不厭人呼爲王青菜

韓偉温州人爲御史出巡河南鎮重有體一方藉以  
爲安及轉河東運使清操特著多所建白

居  
安人廉抱迥立報矩矱以申屛室雖權要不  
叩曹歷守郡二十年家無拓於未仕郡民祠

之

魯穆天白人英風正誼內恕外嚴寡嗜欲薄滋味  
廩  
馬有塵外之趣而官歷都憲克就準範

本朝至  
宣廟開國六七十年太平侈麗上下  
豫遊儒素故風士不以爲習而民皆安之空谷  
足音尤驗能立

英國公張輔謚忠烈祥符人歷事永樂洪熙宣德正  
統累立戰功征交趾生擒黎季犛漢王謀反密遣  
人計公卽縛其人以白事得早覺公爲朝廷眷毗  
寵渥日隆官至太師天下倚以爲重四夷咸知其



名權璫王振視大臣如屬吏獨禮公

都御史陳鑑寬厚清慎宣德中鎮陝西民賴以安者十餘年每還朝必遮道送之不能舍及復鎮歡欣鼓舞迎之數程或久旱至則大雨饑則賑之人謂流惠太過而短於激揚豈知公之存哉謚僖敏吏部尚書郭璫精吏事簡切不泛臨事從容喜怒不形於色正統初因蝗旱旨咎諸大臣衆欲乞歸公獨以主少不可云受先朝付托若皆罷去不以懟乎識者韙之謚

魏驥蕭山人謙虛守禮簡朴性成臞然若不勝衣為教官汲汲以成就人才為務及入考功以清正聞正統初陞冢宰時王振藉寵大臣交媚之公贊用一帕振亦不較且重之厚德雅望年九十八終遺命不請謚葬後謚文靖

虎據於林蛇遊於澤非鷓鴣之讐鷓鴣從而號之以其蓄異心之故也牛牧於田豕眠於圃非烏鵲之馭烏鵲從而乘之以其無異心之故也英國崇倚陳臺留感郭魏終譽信無所覲於外用此道也然陸象山有曰馴海上之鷗狎呂梁之水可以謂之無心而不可謂之道心其復有



所懷乎

學士曹鼎才志通爽預經筵敷納甚明暢正統末扈從土木權璫恣挾進兵成國公朱勇膝行聽命尚書有竟日跪伏草中際無一語者公抗聲曰臣子不足惜社稷安危之繫曾無念乎尋被難謚文襄尚書鄺埜郴州人飭躬縝慮勉勉於學永樂中爲御史命察阻鈔法按犯邊倭寇失律擒山海關賄吏救活營後疫人辨石州民不軌之誣皆以廉平稱宣德中陝右率亭宜川饑公爲移粟移民後擢尹京兆節用愛民豪狡不得爲術正統初擢兵部公務惜其力養其銳氣以待不虞天下總小旗例試京師受代以公請免已已扈從遇害謚忠肅孔子曰朝聞道夕死可矣修短有數夷險自天土木之變死者十萬餘人而臣工且五十二員聽僵靡腐無所見於其生則無所齒於其死中間所惜張公輔王公佐然英國老不克役尸書弱不任事其耿耿不死獨曹鄺兩公而已嗚呼安得更進於是求可夕死於生存之日哉

侍講劉球性廉介從弟爲縣令奉匹縑却之又却蜀王厚餽議論慷慨不爲阿比之習卒居切於憂時



正統四年京師大水民饑具陳築泄拯濟之方時  
北虜及麓川酋不靖上疏請罷南征以專備北八  
年進言權不可下移王振怒下錦衣獄指揮馬順  
阿振意適有董璘圖太常順栲織令招球所畫謀  
當朝捧出支解其體海內寃之謚文愍

衝勢焰之初燎探政源之極徹克毅而明文愍  
之不可及有世心者皆瞠乎其後矣然信而言  
道也近而言情也當事而言忠也諷而言幾也  
待而言重也則文愍之爲志不甚可悲乎哉

楊洪昌平侯起行伍有機智累立邊功善用奇劫虜  
營搆其虛胡人呼爲楊王宣德正統間受知密勿  
謚武襄

襄城伯李隆凝重宏遠識大體守南京最久雖富貴  
擬王公而雅重斯文特恭下士之禮正統中以得  
人心見疑召還京乃托近聲妓以計自安後代者  
數易莫能繼其美者

郭登定襄伯鎮大同廉而尚謀有古良將風已已之  
變力守邊疆大小十數戰設飛天網攬地龍等法  
發其機頃刻數里皆陷又置砲一發五百餘步謚  
忠武



蔣貴定西侯起行伍有膂力與士卒同其苦善搆賊  
巢穴當陣必先直衝部下亦以死向敵用是數取  
勝北胡西羌咸憚服而麓川之征公之功居多但  
不識字短於謀然天性朴實能聽人指示謚武勇  
都督山雲徐州人深沉有將畧用兵如神其持廉守  
正文臣中不多得正統中鎮廣西踰十年馭士官  
以威信且秋毫無犯終始不渝謚襄毅

開國盛時武文一允故羣功胄躋銜於文牒之  
上承平久棧樸化昌士始以牙纛爲藝由是天  
下無武麓川之役是爲正統四年王靖遠驥始  
以總督名而總兵咸聽其節制則自列於戎籍  
者能復有崛然起耿然不自泯者乎若羣公可  
謂不世有矣

張需長於治民先佐鄭州有聲渠有淤者廢水田數  
十年張程工費白守疏之三日而就及守霸州置  
戶簿以驗勤惰民生理日滋又善捕蝗鄰郡悉效  
其法嘗治豪右之擾民者被譖於王振下獄杖幾  
斃竟謫戍邊

曹端霍州訓導專心窮理之學躬率子弟及調蒲士  
子爭欲得之不釋竟終於霍一郡人罷市童子亦



悲泣上官不敢以屬禮相遇至其境必敬謁之凡  
考校必質之以主去取其初信佛曹作夜行燈一  
書獻之父卽舍去所著述尚多

李茂弘正統間考功卽爲人恬淡有識見與人寡偕  
合內閣李文達雅敬之卒不樂於仕而歸

周子良錢唐人正統間爲職方卽苦節縮縮自持謙  
退數鬻戶產以支官費有千戶王者以事褫職周  
愛其材貸之已而王緣其臧從持三百金入酬周  
駭而大叱欲暴於公因伏罪索免乃麾去凡世廉  
上類懷刻削迹此知其非世廉也

鄭子輔郴州人以訓導謝職歸教其子埜登進士埜  
爲陝西按察使以俸易一紅褐寄之大怒曰不才  
子何緣得此不義物汚我卽封還切責之埜欲致  
父伸承顏之曠以聘典文衡圖之大怒曰父蒞子  
宦壤何以示防且將以遺笑又切責之埜由是益  
勵其操

世運太康人懈於名檢瞿瞿良士以羈孤爲能  
存羊之義千金一瓠又奚暇少之

兵部尚書于謙錢唐人自入官所至著經畧朝望特  
隆已巳大駕蒙塵公誓不與虜俱生整朔棊操練電



勉百方動切機宜正誤國之罪懲失事之臣阻南  
遷之策尊嗣君以定國威選材將以當敵愾鼓揚  
中外輯安四方卒使社稷如故鑾輿復還纖毫皆  
公力也天順復辟公磔於市卒之日道路咨嗟天  
日無輝謚肅愍

論忠賢至肅愍未嘗不高其功而悲其報及語  
多儲事輒閣舌歧疑偶見唐史編論曰是有大  
難處者社稷一綫繫肅愍去留以 景皇之銳  
不可以口舌爭兩可一決未為依違夫白痰

之間泫然心淚不知幾成隋舌豈惟功利計

哉又曰道不可變以難易易心非乎或曰禮從  
時事從重勢從順守故軌以覆公餗罪尤大矣  
肅愍肯忍為耶

楊善興濟人景泰元年為都御史 英皇北狩歲餘  
欲遣迎難其人公負忠義之氣慨然願往虜遣黠  
慧偵之先以辭鋒挫其銳暴及見也先風緊射虜  
應對不窮反覆開論朝廷威德及痛發好生向善  
之心遂回鑾輿以歸如公時奉公職不見辱而能  
成功若晉與宋千載一人而已謚忠敏

高穀直隸興化人謚文義端簡廉靜不比匪人正統



未入閣已已北征公居守當乘輿播遷羽檄旁午  
朝議異同中書趙榮欲迎鑾卽解金帶爲贈給事  
中林聰忤權貴置重辟公力救之內閣奏考官劉  
儼黜其子不公命公覆試公亦爲救之時蕭鎡守  
似矣而歎於公終苗衷諳似矣而歎於公施呂原  
厚似矣而歎於公達馬愉慎似矣而歎於公廣  
商輅淳安人本朝中三元一人正統已巳入閣時

天子蒙塵人心汹汹公力主羣議請郕王卽真阻  
抑南遷之說及回鑾盧忠妄言南內事并黃竑言  
易儲事公多阻之已而曹石用權公數裁抑被嗾  
言官構論削爲民成化改元復公官首疏新政八  
事及陳弭災七事復陳弭災八事力爭慈懿葬禮  
請復景皇號婉辭引立東宮疏止玉皇閣齋醮疏  
汪直十罪以罷西廠謚文毅

林聰寧德人居諫垣正色謹言劾大監王振家僮張  
伯通奸狀內侍善增駙馬石璟有罪皆劾之勸迎  
駕禮宜從厚以忤時論憤沮易儲之舉至不肖署  
名議牘幾入重辟有銓法未當輒指斥時宰以是  
銜之釀公左遷天順間爲都御史巡撫賑饑山東  
靖盜江淮整飭大同所至有惠績及縮院章長刑



曹風裁屹屹足鎮浮薄而繫人望謚莊敏

尚書程信河澗人負才智以當世事自任正統末上  
疏劾扈從者失律及追罪首禍薦徵薛瑄等數人  
時命公捍虜都城備出經畧皆切實用景泰中陳  
中興固本十事君心政體反覆數千言聞者壯之  
及督餉廣寧破松番夷寇天順中巡撫遼東著有  
勞績成化初平山都掌叛夷叅贊留務獻納謀謨  
宣威戡暴實兼文武之功謚襄毅

州政夏寅華亭人好文學擢而為辭能自出機杆多  
留心當世務以諸葛武侯范文正文文山自期待  
聞朝廷有善政令即喜形於色嘗疏論兩京離合  
之勢以制天下重臨清徐州以固南北咽喉及論  
文廟禮樂之數正風俗立紀綱崇文化作人材之  
類皆切於政本又曰此生不學此日間過此身一  
敗君子之三惜識者以為名言

陳俊莆田人慎持清白位尚書蕭然不異布衣其為  
政知大體初以部屬督天津宿逋上疏乞免尋督  
餉兩廣假以便宜令越界鹽商引輸二斗以足之  
京饑令監糶公約射利者糴不滿石及佐戶堂部  
事凡出其所裁屢諸屬輒稱如嵌金然謚康懿



年富懷遠人公廉執法遇事敢為不以利害貳其心  
正統己巳督饑濟邊有勞績所至察民隱革奸弊  
尤嫉職吏流民聚南陽陳州十數萬公為藩伯撫  
定之皆願為編氓及為戶書益懋茲以國計為已  
任關中數用兵舉楊璿余子俊可任司饑吏曹以  
為侵官公上疏極論薦賢為國之道謚恭定

都御史軒輓鉅鹿人狷潔性成扣資常祿非其分雖  
織介不取四時布袍蔬食筮仕使淮上冬時溺水  
衣盡濕有司製衣一襲堅却不用以衾裯裹之公  
為御史按察使振揚風紀故舊履其宦所者烹一  
雞以為款約其寮三日米易斤肉為食聞親喪卽  
發行僚屬尚不知總督南京糧儲清操益勵

王翱鹽山人端方清約任事毅然歷仕憲臺鎮松番  
巡廣寧征達虜總督兩廣風持凜凜官民畏而愛  
之嘗築屯堡使烽燧珠連簡閱行伍處議讞辟咸  
中其時宜景泰四年任冢宰剔刷垢弊嚴考察公  
銓註抑倖進以用賢報國為已任門無私謁權勢  
請托不敢行於恩讐一不介意謚忠肅

章綸樂清人景泰初為儀制郎中知無不言疏太平  
致治十六事疏策禦戎論朝貢儀鈔法諫幸佛寺



陳言恤民以回天變陳言中與時政論定科舉解額皆欲明國家大紀鑿鑿中事情至論復儲事大忤旨廷拷一百幾死天順改元釋公獄尋陞禮侍復奏蠲山東租請金以賑宗室論諒陰圖婚之非條救荒四事皆協輿論謚恭毅

王竑河州人賦性正直剛毅不事詭隨立朝侃侃無顧忌且聰敏機辨過人已巳中官王振誤國指彈馬順內臣毛玉皆振黨公為給事中聞大駕蒙塵手捧順玉死成化中公以都憲巡撫所至有建立

刻薦盛朝官至兵部尚書

自惕警已巳縉紳稍稍精神傑者輩出人思奮於政矣本朝治體一大機括於羣公介之他未

暇論

劉實安成人初判金華行撫字之政暇則攻經史尤崇孝義且介守劇嚴有鄉友為其屬者以髡俎致饋謝弗納景泰召脩宋元史後知南雄有中貴使嶺外以貪肆窘辱公雄民夥入爭蔽之中貴以狀聞逮公及廉得其情知為良吏釋之

吾豫訓導景泰初薦至京屢言邊事防禦之方然有肯綮本兵奏用於邊



魏純高密人治易春秋不就舉子業常號於人曰當以天理爲制事之本貧甚寢無完衾身無完褐而取與之介操而不變歲赴人壅賓之召以爲饗飧客遊金陵以直言忤權勢誣謫戍蘇州處戎伍幾三十年超然自得未嘗有沮於色諸將官子從而師之景泰中有以其學行薦召至京以暴卒不及用

砥礪之氣稍稍自內而外自近而遠自達而窮矣故曰入則無法家拂士出則無敵國外患國

恒亡



